

2 Timoti

Nauəuə iətəm tatol keiu lan iətəm Pol təmətei tuvən kəm Timoti Nəghatiən əkuəkir rəha nauəuə u 2 Timoti

?Pəh təmətei nauəuə u? Aposil Pol təmətei nauəuə u.

?Təmətei tətuvən kəm pəh? Təmətei tətuvən kəm Timoti. Kəni in molkeikei məmə ilah min əpəha e niməfaki rəha Efəsis, məmə okotafin. Afin e “Nəghatiən Əkuəkir Rəha Nauəuə u 1 Timoti” o nəhrunian məmə Timoti in pəh.

?Natigiən təhro lanu lan nian təmətei? Nian kəpmən rəha Rom tətəskəlīm Pol əpəha Rom, in təsatigiən e kaləpus, mətəu in təmətətig e rəhan kəti nimə, kəni soldia min kəmautətig ilah min mauteruh vivi məmə in otəsəgimian. Naunun jəptə rəha Uək Min tətəghati e nian min əha. Kəni əmeiko kəpmən təmahli pətigəm in, kəni taliuək əmə mətən o nu keiu. Mətəu rəueiu əha, tinuvən min e kaləpus əpəha Rom, kəni kaləpus əha in tərəh pəhriən ikən. Nauəuə rəha Uək Min təsəghatiən e nian əha, nauəuə tinol naunun rəkis. Kaləpus əha in tətəpu ikən, kəni tiəkis o nətəmimi o nuvənian məsal=pən lan. Luk əmə ilau min. Pol təmolkeikei məmə Timoti otuva meh mətəu-inu in rəhan niəli təuvir. Kəni in molkeikei məmə Timoti in otəmki nauəuə min rəhan.

?Təmətei nauəuə u o nak? Pol təməhrun məmə otəsuvəhiən kohamu in timis. Tol lanəha, in təmətei nauəuə u o nələhu-pəniən niməfaki e

nəhlmi nətəmi asoli pisin min nəuvein təhmen e Timoti. Nian iəkis min kəutəhuva o niməfaki, kəni Pol in tolkeikei məmə Timoti otətəskəlīm Nanusiən Təuvir, kəni matəhtul əskasik e nəhatətəin rəhan, kəni məsəginian e nəni pətigəmiən Nanusiən Təuvir, kəni in otəhtul maru o nətəuiən nəhməiən e nipətin nəmə nərahian otuva.

Pol təməni təuvir kəm Timoti

¹ İəu Pol, u iəu aposil kəti rəha Kristo İesu, iətəm Uhgın təmitəpin rəkis iəu məmə rəhan, kəni mahli=pa iəu məmə iəkəni pətigəm rəhan nəniəskasikiən rəha nəmiəgəhiən itulin e Kristo İesu. ² İətəni təuvir kəm ik Timoti, nətik iətəm iəkolkeikei pik ik.

Pəh Uhgın Tatə mine Kristo İesu rəhatah İərmənig okuəfinə rəhalau nəuviriən, mine nasəkəhruiən, mine nəməlinuiən kəm ik.

Pol təməfəri nətəligiən rəha Timoti

³ Nian rəfin lapin mine lənian, iətəfaki ohnik, kəni mətəni tagkiu kəm Uhgın ohnik. Kəni iatol uək rəhan təhmen=pən əmə e tipik min, kəni iəkəhrun məmə nolien tərəh kəti təsatigian lak. ⁴ Nikiik tətəhti nəhu nəhmtəm, kəni iəkolkeikei pik məmə iəkəruh min ik pəh nikiik otəgian. ⁵ Nikiik tətəhti nəhatətəiən pəhriən rəham iətəm təhmen=pən əmə e nəhatətəiən iətəm təmaupən mətatig e rəham kəha Lois mine rəham məmə İunis, kəni iəkəhrun pəhriən məmə rəueiu in tinatig lam.

⁶ Kəni tol lanəha, iətəni min kəm ik məmə onəkelel nigəm rəha nəsanəniən iətəm Uhgın

təməfɪnə o noliən rəhan uək. Uhgɪn təməfɪnə nəsanəniən əha nian iəmələhu=pən nəhlmək mətəfaki=pɪnə lam. ⁷ Ol uək e nəsanəniən əha, mətəu-inu Uhgɪn təsəfaiən kəm tah nɪkin rəha nəgɪniən, mətəu təməfa nɪkin rəha nəsanəniən, mine nɪkin rəha nolkeikeiən, mine nɪkin iətəm tatol noliən mɪn iətəm in təhrun məmə kotəhruahru.

⁸ Kəni inəha, saulisian o nəni pətigəmiən lərməniɡ, kəni saulisian lak iətəm iətətiɡ e kaləpus o nərgɪn. Iətətəu nahməiən o nanusiən təuvir, kəni nəmə nian əskasik tətuvə ohnik, nəkəkeikei mol məmə iəu mine e nəsanəniən iətəm Uhgɪn tətəfɪnə kəm ik. ⁹ Uhgɪn təmosmiəgəh itah kəni mauin e tah məmə kitah okəhuva rəhan mɪn nətəmimi nətəm kotasim, kəni təməsolian o nati kəti iətəm kitah kəmotol, mətəu in təmol e rəhan aru əmə nətəliɡiən, mine nəuviriən. Nian Uhgɪn təməsol əhanəhiən niftəni mine, mətəu in təmələhu rəkis nəlpəkəuiən məmə in otəfən rəhan nəuviriən kəm tah e Kristo Iesu, ¹⁰ mətəu rəueiu, in təmol əpu nəuviriən əha kəm tah e nuvaiən rəha Iosmiəgəh rəhatah, Kristo Iesu. Kəni Kristo təmohəpɪs nɪmisiən mine rəhan nəsanəniən, kəni təmasiəgəpɪn mol əpu suaru rəha nəmiəgəhiən u naunun tikə, kəni kitah kauteh e nanusiən təuvir əha.

¹¹ Kəni Uhgɪn təmitəpɪn iəu məmə iəu iəgəhati, mine aposil, mine iəgətun o nanusiən təuvir əha. ¹² Tol lanəha iətətəu pɪk nahməiən ohni u ikɪnu e kaləpus. Mətəu iəsaulisian, mətəu-inu iəkəhrun məmə pəh u iətəhatətə lan, kəni məhrun vivi məmə

in tæhrun neh viviæn nati nak iætəm in tæmæləhu=pa e nəhlmək o naunun nian.*

¹³ Itəu=pən əmə suaru rəha nəgətuniæn u tæhruahru iætəm iəməni kəm ik, kəni ol nati u e nəhatətəiæn mine nolkeikeiæn e Kristo Iesu. ¹⁴ E nasiruiæn rəha Narmın Rəha Uhgın iætəm tətətig e nikitah, kəni ateruh vivi nati təuvir iætəm Uhgın tæmæləhu=pən e nəhlməm.

¹⁵ Nəkəhrun məmə rəhak mın nətəmimi əpəha Esiə, ilah Fukeləs mine Hermokenəs, ilah rəfin kəmotəgım rəkis motəpəh iəu.

¹⁶ Pəh İərməniğ otasəkəhruiں Onesiforəs mine rəhan mın, mətəu-inu nian tepət təmasiru lak mətəfəri rəhak nətəligiæn. Kəni təməsaulisiæn məmə iəmətətig e kaləpus. ¹⁷ Nipəhrioniæn, nian in təmuva Rom, təməsəl pik lak mətəuarus meruh iəu. ¹⁸ !Pəh İərməniğ otasəkəhruiں in e naunun nian! Ik nəkəhrun vivi natimnati təuvir mın iætəm təmöl kəm iəu əpəha Efəsis.

2

Soldia təuvir rəha Kristo Iesu

¹ Ik u nətik, pəh Uhgın otol nıkim təsanən e nəuviriæn iætəm tatsipən e Kristo Iesu. ² Nəmətəu rəkis natimnati mın u iætəm iəməgətun ik lan e nəhmti nətəmimi tepət. Kəni os rəhak nəghatiæn mələhu=pən e nəhlmı nətəmimi nəuvein nətəm nətəni nipəhrioniæn e lah, kəni ilah okotəhrun nəgətuniæn nətəmimi nəuvein mın lan. ³ Nian nərahian otuva, mətəu əhtul əskasik kitah mın

* **1:12** Suaru pişin o nəuhliniæn fes 12b: “kəni məhrun vivi məmə in tæhrun neh viviæn nati nak iætəm iəu iəmələhu=pən e nəhlməm o naunun nian.” **1:14** 1Tim 6:20

ik, tǎhmen e soldia tǎuvir kǎti rǎha Kristo Iesu. ⁴ E nian rǎha nǎluaginian, soldia kǎti tǎsolian nǎtimnati rǎha nǎtǎmimi ǎpnapin ǎmǎ, mǎtǎu tatol ǎmǎ uǎk rǎha soldia mǎtǎu-inu, in tolkeikei mǎmǎ rǎhan iǎtǎmi asoli rǎha soldia min, nikin otagiǎn lan. ⁵ Kǎni e nolian ǎhmen ǎmǎ lanǎha, iǎtǎmi tǎtaiu mǎmǎ in otol win, in otǎkeikei mǎtǎu=pǎn lou min rǎha naiuiǎn, mǎtǎu nǎmǎ tǎsolian, kǎni in otǎsosian nǎtǎouiǎn rǎha nol winian. ⁶ Tǎhruahru ǎmǎ min lanǎha mǎmǎ iǎtǎmi tatol pik uǎk e nǎsumian, in otaupǎn mǎulǎk lan. ⁷ ǎtǎlig vivi e nati nak iǎtǎni kǎm ik. Iǎrmǎnig otasiru lam o nǎhrunian nǎpǎti nǎghatian min u.

⁸ ǎtǎtǎlig e Iesu Kristo u nǎuanilǎuis rǎha Tefit, kǎni Uhgǎn tǎmosmiǎgǎh in e nǎmisiǎn. Kǎni inu nǎnusiǎn tǎuvir iǎtǎni pǎtigǎm. ⁹ Kǎni iǎtǎtǎu nǎhmǎian o nǎnusiǎn tǎuvir ǎha, kǎni nǎpǎhriǎnian, kǎmǎlis iǎu e sen tǎhmen=pǎn mǎmǎ iǎu iǎklǎh kǎti uǎ iǎhamu itǎmi. Mǎtǎu kǎsǎlisiǎn nǎghatian rǎha Uhgǎn. ¹⁰ Tol lanǎha, iǎtǎhtul ǎskasik e nǎhmǎian min rǎfin rǎhak o nǎsiruiǎn e nǎtǎmimi nǎtǎm Uhgǎn tǎmitǎpǎn ilah, mǎmǎ in otosmiǎgǎh ilah e Kristo Iesu, kǎni ilah okotatig e nǎuviriǎn ǎhagǎhag rǎha Uhgǎn, iǎtǎm nǎunun tikǎ.

¹¹ Inu nǎghatian tǎtǎni pǎhriǎn mǎmǎ, Okǎmǎ kǎhuva kǎtiǎh e Kristo e nǎmisiǎn rǎhan, kǎni okotǎmiǎgǎh min kitah min.

¹² Okǎmǎ kautǎhtul ǎskasik e nian ǎskasik min, kǎni kitah okotarmǎnig min kitah min.

Okǎmǎ kitah kotǎniapǎn lan,

kəni in otəniapin e tah.

¹³ Okəmə kitah kəsotoliən rəhatah nonauvil,
mətəu in tatol rəhan nonauvil,
mətəu-inu Uhg̃in otəkeikei matol rəhan noliən
nian rəfin.

Ioluək təuvir rəha Uhg̃in

¹⁴ Natimnati min u, onəkəkeikei mətəni
mətisimaru lan kəm rəham min nətəmimi. Əni
əskasik kəm lah lanəha məmə, “Iatəni e nərgi
Uhg̃in məmə itəmah nəsotorgəhuiən o nipəti
nəghatiən min.” Norgəhuiən lanəha təsasiruiən
e iətəmi kəti, mətəu tətərək̃in əmə nətəmimi nətəm
kəutətəu. ¹⁵ Alkut əskasik məmə onək̃uva ioluək
təuvir iətəm nian Uhg̃in tateruh rəham uək, in
təhrun nənien məmə, “Əuəh, nəmol təuvir,” kəni
nəsaulisiən o rəham uək, mətəu-inu nətəgətun
əhruahru nəghatiən rəha nipəhriənien.

¹⁶ Mətəu əpəh nəghatiən min u tol tanpən əmə
iətəm kotərəh məsotisiaiən Uhg̃in, mətəu-inu
nətəmimi nətəm kəutəghati lanəha, nəmiəgəhiən
rəhalah tatuvən matuvən əmə o noliən min iətəm
Uhg̃in təməki lan. ¹⁷ Nəgətuniən rəhalah in
təhmen=pən əmə e niməgim pien iətəm tətəmahali
matepət matol iahgin. Suah mil u kuol lanu
lan, ilau u Haemeneəs mine Filitəs, ¹⁸ iətəm
kinəmkarəpən rəkis e suaru rəha nipəhriənien.
Katuəni məmə Uhg̃in təmol itah kotəmiəgəh min
rəkis e nimisiən, kəni ko Uhg̃in təsəfa minien
nipətita vi nian Iesu tuva min. Kəni suah
mil u kətuərək̃in nəhatətəiən rəha nətəmimi
nəuvein. ¹⁹ Mətəu tol pau lanəha, nimə iətəm

Uhgin taturvlækin tətəhtul tiäkis, kəni təmətēi=pən lan mēmə, “Iərməniġ təhrun nətəmi mīn u rəhan mīn,” mīne, “Nətəmi mīn u kəutəni mēmə ilah nətəmimi rəha Iərməniġ okotəkeikei motəpəh nolīən tərah mīn.”

²⁰ Ətəliġ-to lan. E nimə rəha iətəmi rəhan nautə tepət, kətim pišin pišin mīn tepət. Kəməu nəuvein e nimaniviuv təuvir aġin. Kəməu nəuvein e nīmasiə mətū.* Uək rəha kətim vi, in uək asoli iətəm katisiai. Kəni uək rəha kətim əuas, in uək əpnəpīn əmə iətəm tol naulisiən təhmen əmə o nosiən nīmənərik. ²¹ Okəmə iətəmi kəti tatol rəhan nəmiəġhiən tətəhlan vivi mətəpəh nolīən rəha naulisiən, in təhrun nolīən uək asoli iətəm katisiai, kəni Uhgin otələhu kalīn mēmə rəhan pišin əmə, kəni mol əpenə-penə mēmə otol uək təuvir mīn.

²² Aiu muvən isəu o nolīən tərah mīn iətəm tateviə e niki nətəm aluə. Kəni itəu=pən vivi suaru rəha natimnati mīn u: nolīən iətəm təhruahru, mīne nəhatətəiən, mīne nolkeikeiən, mīne nəməlinuiən. Itəu=pən suaru əha itəmah nətəmi mīn u nətəm kautətəpuəh o nasiruiən rəha Iərməniġ e nīkilah iətəm təuvir. ²³ Əpəh maġim rəkis e nəġhatiən alməli mīn iətəm nīpətillah tikə. Nəġhatiən mīn əha kautiuvī=pa əmə norgəhuiən. ²⁴ Ioluək rəha Iərməniġ, ko in təsorgəhuiən, mətəu in otəkeikei matol təuvir kəm nətəmimi rəfin, kəni otəkeikei muva iətəmi rəha nəġətuniən, kəni rəhan nətəliġiən təfəməh. ²⁵ Okəmə nətəmimi

2:19 Nam 16:5; Aes 52:11; Jon 10:14; 1Kor 8:3 * **2:20** Nəġhatiən əhruahru rəha Kris tətəni mēmə, “E nimə rəha iətəmi rəhan nautə tepət, pilet pišin pišin mīn tepət. Kəmol nəuvein e aiən u kol tətəraip-oraip, nəuvein e silfə, nəuvein e niġi, nəuvein e niiftəni.”

2:22 1Tim 6:11

2:23 1Tim 4:7

nəuvein kəutəni rah rəhan nəgətuniən, kəni in otəkeikei mægətun vivi ilah e noliən mətig əmə. Kəni nəmə təhro Uhg̃in otegəhan məmə ilah okotəuhlin rəhalah nəmiəgəhiən, məmə ilah okotəhrun n̄ipəhriəniən. ²⁶ Kəni ilah okəhuva m̄in e nətəligiən təuv̄ir, kəni motagim rəkis e lalig rəha Setən, iətəm təmaskəlim ilah kəni kautol nəuiən.

3

Noliən tərāh m̄in iuək̄ir o Naunun Nian

¹ Mətəu onəkəkeikei məhrun nəghatiən u məmə nian əskasik m̄in okəhuva iuək̄ir o Naunun Nian. ² Tol lanəha mətəu-inu, nətəmimi okautətəlig aru əmə e lah m̄in, kəni ilah okotolkeikei p̄ik m̄ani. Nətəmimi nətəm kəutəni aru əmə nati, mətəfu aru ilah m̄in, mətəni rah nətəmimi m̄ine Uhg̃in, mətəhti nəuia tatə m̄ine məmə, mətəpəh nənien tagkiu e n̄ikilah, kəni okəsotisiaiən Uhg̃in. ³ Rəhalah nolkeikeiən otarfu, məsotaluiən e nərahien kəti okol e lah. Okəsotarməniğiən e noliən m̄in rəhalah. N̄ikilah otagiən o nərəkiniən nətəmimi m̄ine nərḡilah. Okotəməki e nati iətəm təuv̄ir. ⁴ Ilah kəūit kəsua m̄in, kəni okotol natimnati tərāh nəuvein mətəu kəsotətəligiən məmə nati nak otiet lan. Kəni ilah okotəfəri aru ilah, kəni ilah okotolkeikei p̄ik natimnati o nətəuiən təuv̄ir e n̄ipət̄ilah, mətəu ilah okəsotolkeikeiən Uhg̃in. ⁵ Okotol noliən m̄in rəha nəfaki m̄in məmə nətəmimi okoteruh, mətəu ilah okəsotolkeikeiən məmə nəsanəniən rəha Uhg̃in otəuhlin n̄ikilah. Uvən isəu o nətəmimi m̄in u.

⁶ Əpəh əmə ilah mətəu-inu nəuvein kauteh suaru o nuvəniən lahuənu mīn, kəni mautiuvī rəkis nətəligiən rəha nīpətan nətəm rəhalah nətəligiən təsəskasikiən. Təfagə tərəh mīn rəha nīpətan mīn u, in tiəkis pik o lah, kəni noliən tərəh mīn tepət iətəm ilah kautolkeikei, kautiuvī=pən ilah. ⁷ Kəni nīpətan mīn əha kautətəlig vivi e nəghatiən mīn rəfin rəha nətəmi mīn əha, mətəu ko kəsotəhruniən nəghatiən rəha nīpəhriəniən. ⁸ Aupən ikīn, Janes mine Jampres kəmətuəməki e Mosis,* kəni e noliən əhmen əmə lanəha, nətəmimi mīn əha kautəhti nəghatiən rəha nīpəhriəniən. Nətəmimi mīn u, rəhalah nətəligiən təriauəh e noliən tərəh mīn, kəni noliən rəha nəhatətəiən rəhalah in neiuəiən əmə in əmə. ⁹ Mətəu nəgətuniən eiua rəhalah, ko təsəhtuliən tuvəh, mətəu-inu nətəmimi rəfin okoteruh məmə ilah kəsotəhruniən nati iətəm kəutəghati lan, kotəhmen=pən əmə e suah mil əha.

Nəghatiən rəha Pol kəm Timoti

¹⁰ Mətəu ik, Timoti, ik nəmətəu=pən rəhak nəgətuniən, mine noliən rəha nəmiəgəhiən rəhak, mine nati nak iətəm iəkolkeikei məmə iəkol, mine rəhak nəhatətəiən, mine noliən rəha nətəligiən rəhak iətəm təfəməh, mine rəhak nolkeikeiən, mine nəhtul əskasikiən rəhak, ¹¹ kəni nəkəhrun nian əskasik mīn iətəm tətuvə e rəhak nəmiəgəhiən, mine noliən tərəh mīn iətəm katol lak. Kəni nəkəhrun noliən əskasik mīn iətəm kəmol lak əpəha Antiok, mine Ikoniəm, mine Listra. Mətəu İərməniğ təmos rəkis iəu e natimnati

* **3:8** Janes mine Jampres, ilau iəmki nərik mil rəha kig rəha Ijip. Nərgilau tikə e Nauəuə Rəha Uhgīn, mətəu ilau əha ikīn e nauəuə pisin mīn rəha nətəm Isrel. **3:8** Eks 7:11 **3:11** Uək 13:50; 14:5; 14:19

mīn rāfin əha. ¹² Nīpəhrīənīən, nətəmimi rāfin nətəm kotolkeikei məmə okotol noliən iətəm Uhgīn tolkeikei, kəni motol e Kristo Iesu, nətəmimi okotol tərāh kəm lah, ¹³ mətəu nīan kətīəh mīn əmə, nol təfagə tərāh mīn mīne nətəmimi rəha neiuəiən,† ilah okotol noliən tərāh məhuvən motol nətəm kotərah agīn. Ilah nətəm kətēiuə e lah,‡ kəni ilah okotēiuə pīk agīn e nətəmimi.

¹⁴ Mətəu ik, Timoti, onəkeikei mətītəu=pən əmə natimnati təuvīr mīn iətəm kəməgətun ik lan nətəm nəmāni əskasīk rəkīs nīpəhrīənīən lan, mətəu-inu ik nəkəhrun vivi nətəmimi nətəm kəmotəgətun ik lan. ¹⁵ Kəni nīan nəmatəkəku mətəuarus=pa u rəueiu, nəməhrun Nauəuə Rəha Uhgīn iətəm təhrun nəfinəiən neinatīgīən məmə nəkəhrun nosiən nəmiəgəhiən itulīn lan o nəhatətəiən e Kristo Iesu. ¹⁶ Nəghatīən mīn rāfin e Nauəuə Rəha Uhgīn, kəmotsipən əmə e nohlī Uhgīn, kəni kəutasīru e tah. Kəutəgətun itah natimnati tepət. Mautəni əpu noliən tərāh mīn rəhatah, mautəgəu əhruahru itah, kəni məutəgətun itah e noliən mīn iətəm kotəhruahru. ¹⁷ Kautol əpenə-penə itah u nətəmimi rəha Uhgīn məmə kitah kəhuva nətəmimi nətəm kotəhrun noliən uək təuvīr mīn rāfin.

3:11 Sam 34:19 **3:12** Mat 16:24; Jon 15:20; Uək 14:22

† **3:13** “nətəmimi rəha neiuəiən” – Nīpətīn məmə ilah nətəmimi nətəm kəutəni məmə ilah kautol nati kətī məmə okotēiuə e nətəmimi nəuvein. Inu təhmen e nətəmimi nətəm Pol tətəni kəm Timoti. Ilah kəutəni məmə ilah nəgətun mīn rəha nīməfaki, mətəu kəpə, kəuteiuə. Səniəmə rəha nīməfaki. Kəutəni əmə rəhalah əmə nətəlīgīən mīn məmə okotēiuə e nətəmimi. ‡ **3:13** Setən uə nətəmimi pīsīn mīn okotēiuə e lah. **3:16** Rom 15:4

4

¹ Timoti, oiäkəni=pinə nəghatiən keikei kəti kəm ik e nəhmti Uhgın mine Krīsto Iesu iətəm otakil nolian rəha nətəmimi rəfin, nətəm kautəmiəgəh mine nətəm kəmoħmis, kəni oiäkəni=pinə nəghatiən u mətəu-inu in otuva mīn mətarməniğ. Kəni inəha, iətəkeikei mətəuvahag əskasik mətəni kəm ik məmə, ² əni pətigəm nəghatiən rəha Uhgın, kəni əhtul maru o nəni pətigəmiən, nati əpnarın məmə otimətiğ əmə, uə tiəkis. Uhalpın nati məgəu əhruahru nolian rəha nətəmimi, əniəhu nolian tərəh rəha nətəmimi, kəni məuvahag məfəri nətəliğian rəha nətəmimi. Kəni nian natol uək mīn u, rəham nətəliğian otəkeikei məfəməh, kəni rəham nəgətunian otəkeikei məhruahru vivi məuvir.

³ Nəkəkeikei mol lanəha mətəu-inu, nian iətəm tətuvə, nətəmimi okəsotolkeikeian məmə okotətəliğ e nəghatiən pəhriən. Mətəu nikilah əmə otit ilah mīn, kəni ilah okotos iəgətun pişin pişin mīn motolkeikei məmə nəgətun mīn okotəhli matəlgilah motəgətun nəghatiən mīn iətəm ilah əmə kotolkeikei. ⁴ Kəni ilah okotəuhlin nimatəlgilah o nətəliğian e nəghatiən pəhriən, kəni məhuvən məutətəliğ e nonagei eiuə mīn.

⁵ Mətəu ik, ateh vivi rəham nətəliğian mine rəham nolian mīn e nian mīn rəfin, nati əpnarın nati pişin pişin mīn kəutəhuva e rəham nəmiəgəhiən, kəni əhtul əskasik nian nərahian tətuvə, kəni uvən məni pətigəm nanusiən təuvir, kəni ol rəfin uək iətəm Uhgın təməfinə kəm ik məmə onəköl.

6 Timoti, ol natimnati min əha, mətəu-inu otəsuvəhiən, iəu iəkimis. Kəni rəueiu nəmiəgəhiən rəhak təhmen e wain iətəm kinatiuvi=pən e oltə məmə okol sakrifais lan.* 7 E rəhak nəluaginian təuvir rəha nəhatətəiən, iəmatu vivi e nəhlmək, kəni e rəhak naiuiən, iəu iəmaiu vivi rəkis mətəuarus=pa naunun naiuiən, kəni iəu iəmətaskəlim vivi nolien əhruahru rəha nəhatətəiən kəni iəməsəpəhiən uək rəha nəni pətigəmiən nanusiən təuvir. 8 Kəni rəueiu, İərməniğ iətəm rəhan nakilian təhruahru vivi, in təmol əpenə-penə e nətəouiən rəhak, inu kəfəfau rəha iətəm tatol win e rəhan naiuiən, kəni in otəfəfau=pa kəm iəu e nian rəha nakilian mətəu-inu in təmakil iəu məmə rəhak nəmiəgəhiən təhruahru. Kəni səniəmə iəu pişin əmə, mətəu otəfən kəm nətəmimi rəfin nətəm kotolkeikei mautəhtahnin məmə in otuva min.

Pol təməni pətigəm nanusiən rəha in min nəuvein

9 Əsal uəhai əmə rəham suaru məmə onəkuva meh iəu, 10 mətəu-inu Timəs, u tolkeikei pik nati rəha niftəni u, in tinəpəh iəu minuvən Təsəlonaike. Kresens tinuvən rəkis Kəlesia, kəni Taitəs tinuvən rəkis Talmesia. 11 Mətəu Luk pişin əmə itimlau min. Təuvir məmə nian nətuva, onəkit Mak itəlau min, mətəu-inu in təhrun nasiruiən e uək rəhak. 12 İəmahli=pən rəkis Tikikəs tuvən əpəha Efəsis. 13 Kəni nian nəkuva, onəkos rəhak kot iətəm

4:6 Fil 2:17 * 4:6 Nian nəuvein, nian nətəm Isrel kautol naunun e lafet, kəni mətauvəregin wain məmə kautol sakrifais lan tatuvən kəm Uhgın. Təsuvəhiən nəmiəgəhiən rəha Pol tol naunun, kəni in təməni məmə nəmiəgəhiən rəhan təhmen e wain u tatol naunun e lafet lan. 4:7 1Tim 6:12 4:8 1Kor 9:24-25 4:11 Uək 15:37-39; 2Kor 8:23; Kol 4:14

iämälähu kəm Karpəs əpəha Troas, kəni onəkos mīn rəhak nauəuə mīn iətəm kəmaiu-aiu,† kəni iəkolkeikei pik mīn məmə onəkos nauəuə mīn u kəmol e nilosi sipsip.

14 Suah u Aleksantə u iətəmimi rəha nolian uək e aiən, in təmatol təräh lak. Iərmənig otəfən nītai nətəouiən rəhan o natimnati mīn əha. 15 Kəni ik mīn, atətəu ik o suah konu, mətəu-inu tətəhtipəsīg e nəghatiən mīn rəhatah.

16 Nian iəmaupən məhtul e kot məmə iəkəni pətīgəm nəghatiən mīn rəhak, suah kəti təməsəhtul pətīgəmiən masiru lak, mətəu nətəmimi rəfin kəmotagim motəpəh iəu. Pəh Uhgīn nīkin otəsəhtiən natimnati rəfin iətəm ilah kəmotol. 17 Mətəu Iərmənig təməhtul e nīkalik məfa nəsanəniən kəm iəu məmə iəkəni pətīgəm vivi nəghatiən rəhan, kəni pəh Nanihluə‡ mīn okotətəu. Kəni təmləfətīgəm iəu e nohli laion. § 18 Iərmənig otos rəkis iəu e nərahien mīn rəfin iətəm okol kəm iəu, kəni in otaskəlīm vivi iəu, kəni mos iəu iəkuvən e negəu e neai, ikin tətərmənig ikin. Pəh okətəfəri nərgīn tatuvən matuvən naunun tikə. Əuəh.

Naunun nəghatiən

19 Iatəni təuvir kəm Prisilə mīne Akuilə, mīne Onesiforəs mīne rəhan mīn. 20 Erastəs təməsītəu=paian iəu, in əpəha Korən. Kəni nian

† **4:13** E nian əha, nauəuə rəfin kəmaiu-aiu. Kotos mapepe əfəməh kəti kəni kəmaiu-aiu. **4:13** Uək 20:6 **4:14** Aes 59:18; Rom 2:6

‡ **4:17** Nanihluə, Ianihluə – Afin-to e tiksīnəri. § **4:17** Nəghatiən mīn nəuvein e fes mīn 9-17, təhmen əmə e nəghatiən mīn nəuvein e Sam 22. **4:19** Uək 18:2; 2Tim 1:16-17

iämiet Maelitəs, mupəh Trofiməs tətatiġ mətəu-
inu in tatimis. ²¹ Alkut pik məmə nəkuva uəhai
əmə u ikinu, uərisiġ nian rəha nətəpuian. Iupuləs
tətəni təuvir kəm ik, kəni Putens, mine Linus, mine
Klotiə, mine piatah min rəfin u ikinu kəutəni təuvir
kəm ik.

²² Pəh Iərməniġ tətatiġ itəlau min. Pəh Uhgın
otəfinə rəha nəuviriən kəm təmah.

Nauəuə Asim Rəha Uhg̃in Nəmtət̃iən Vi
The New Testament in the Whitesands language of
Tanna Island, Vanuatu
Niutesteman long Nərak, lanwis blong Whitesands
Tanna, Vanuatu

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 22 Feb 2024 from source files dated 31 Aug 2023

913a182a-255f-5344-b6b0-0294ba221e87